

混元聖紀卷之一

宋觀復大師高士謝中瀨編

太上老君者大道之主宰萬教之宗元出乎太無之先起乎無極之源經歷天地不可稱載終乎無終窮乎無窮者也其隨方設教歷劫為師隱顯有無罔得而測然垂世立教應現之迹昭然若日月其可無記述乎夫何紀傳率多踈略如司馬遷史記班固古今人表劉向之載列仙嵇康皇甫謐之叙高士與夫葛稚川之神仙傳暨集仙總仙等傳例皆歲裂百不具一尹文操編聖記八百二十章賈善翔傳猶龍析為百篇雖記述頗詳而枝蔓旁引首尾失次其間取舍未免乖違二三其說覽者滋惑每一披卷為之感慨誠教門之闕典也今不揆愚陋編考三教經典傳記究其源流仍序歷代崇奉之事編為聖紀冠以年譜若夫五太之初九皇之始真文未兆載籍巨詳今始纂書史所載老君應世之歲月述其年譜於左

天皇

皇甫謐三五歷云天地初立有天皇氏十二頭木德王歲起攝提兄第十二人立各一萬八千歲徐整三五歷紀云元炁肇始有神人號天皇時老君降世虎通玄天師一號女中大法師唐翰林學士承旨樂朋龜撰青羊宮記云太上玄元老君應運降跡與天皇為師上清下濁之初開相離未遠六合八紘之乍圻相去未遠正方圓上下之形定洪荒朴略之狀川新融而水仍晦土始結而石未堅配四海於四神付五行於五帝

地皇

老君下降為師號有古大先生唐紀云是時乾象猶低坤形仍薄立極定位敷化建功我太上老君屑跡下降與地皇為師分配剛柔制定寒暑地增博厚天益高明聖力無窮神功靡測萬木甲拆萬草勾萌羽族毛群區分於兌離之位介蟲鱗類支分於坎震之宮

人皇春秋緯作九頭紀

老君下降為師號盤古先生三五歷紀云天地混沌如雞子盤古生其中天地開闢盤古在其中後乃有三皇此三才之始也唐紀云已踰青海之年又離青海之歲二聖既理四表生光我太上老君博施濟眾與人皇為師三百六十之川初分血脉一萬五千之策乍配偶奇三壬三乙之神離胎於水木六丙六辛之將出孕於火風一百五十六代四萬五千餘年始稱通玄天師再號金闕帝君三名盤古先生

五龍紀五姓玉皇通一歷勾龍紀

連通紀六姓或作連通春秋緯及初置天地經作合雄紀

合雄紀三姓春秋緯作合雄紀初置天地經作合雄紀

五姓紀河圖云通紀五姓是謂五姓紀又序次

敘命紀四姓置天地經作厚

修飛紀九姓河圖

因提紀河圖作

禪通紀七十二姓河

流訖紀史記索隱三皇紀云流訖紀當黃帝時制九紀之間

按河圖代姓記太古者生民之始也男女始精以女生為姓始三頭謂之合雄紀生號三世合雄氏沒子孫相傳記其壽命是謂叙命紀通紀四姓生子二世男女眾多群居連通是謂連通紀生子一世通紀五姓是謂五姓紀天下群居以類相親男女眾多分為九頭各有居方故號居方氏生子三十二世強弱相凌欲生吞害中有神人提挺而治故號提挺氏生子三十五世通紀七十二姓故號通姓氏通姓氏之後有有巢氏天下九頭咸歸而尊事之有巢氏生燧人氏燧人氏生伏羲河圖及三五歷云自人皇已後有五龍氏燧人氏大庭氏柏黃氏中央氏卷須氏栗陸氏驪連氏赫胥氏尊盧氏渾沌氏吳英氏有巢氏朱襄氏葛天氏陰康氏无懷氏而不知其姓氏世次三墳載天皇伏羲氏策辭云皇曰命子襄居我飛龍之位生我圖文代我咨告於四方上下無或差忒後吳英氏進曆於君曰曆起甲寅皇曰甲日寅辰木王於卯二月乃集眾於傳教臺告民示始甲寅后女媧氏

无懷氏輔君之右上相共工下相皇且飛龍朱襄氏潛龍吳英氏居右左栗陸氏居北赫胥氏居南昆連氏居西葛天氏居東陰康氏居下九州之牧各統其人群居於外皇曰栗陸子居我飛龍之位主養草木開導泉源母或失時曰大庭子主我屋室視民之未居者喻之借力同創其居無或寒冷曰陰康子主我水土俾民居處無或漂流勤於道陸曰混沌子居我降龍之位惟主於民曰昆連子主我刀斧無俾野獸獾虎之類傷感生民皇曰四方之君咸順我辭則世無憂惟愛於民則位不危又曰子無懷安惟安於民民安子安民危子危其子念哉以三墳之書考之則伏羲氏為後天皇氏女媧无懷其后也朱襄吳英其子也共工皇且其相也栗陸赫胥昆連葛天大庭陰康混沌皆其神也居內則其六卿分職以治其國在外則為四方君長以牧其民所謂九頭者是也然皆一時人初無世代之異而歷代典籍所載多列為先後何也意者伏羲氏沒其后嗣及其九頭之臣皆

享遐齡且迭為君主耶不然則其臣之子孫咸祚有國因祖命氏耳韓詩外傳以為自古封泰山禪梁甫者萬有餘家仲尼觀之不能盡識管子亦曰古封泰山七十二家夷吾所識十有二焉其首有無懷氏則知其伏羲之前帝王世代先後不可得而識者蓋亦多矣春秋緯稱自開闢至於曠麟凡三百二十七萬六千歲分為十紀一曰九頭紀二曰五龍紀三曰攝提紀四曰合雄紀五曰連通紀六曰叙命紀七曰修飛紀八曰因提紀九曰禪通紀十曰流訖紀蓋流訖紀當黃帝時制九紀之間今自周敬王之三十九年春秋魯哀公之十二年庚申西狩獲麟逆數至黃帝元年丁亥纔三千九百三十歲自黃帝推而上之至於開闢當有三百二十七萬二千餘歲其間帝王年代莫得而考雖間見於諸子圖緯之書然疑相傳無所折衷今姑存而不論伏羲太昊姓風木德初造曆元年起甲寅女媧繼之子孫相承四萬五千六百年河圖代姓紀云伏羲氏燧人子也因風而生故風姓龍馬負圖始畫八卦命飛龍氏

造六書命潛龍氏作甲曆伏犧制牛冶金成器教民炮食易九頭為九牧因龍出而紀官因鳳來而作樂天下之民號曰天皇太昊伏羲時老君降世居荒野號鬱華子唐紀云庖犧氏之王天下也我太上以道

弘濟降跡為師教之以畫八卦指之以分三才助之以造書契之文製之以代結繩之政

祝融炎帝姓姜火德起丙辰始教民陶石故號炎帝

按禮記謚號記先祝融後神農餘注則先神農後祝融切謂祝融為炎帝之祖以火德王必不後於神農今當以禮記為正其高陽氏之子黎為火正故亦號祝融至今為南方司火之神月令曰其帝炎帝其神祝融則祝融為火德之祖明矣時老君降

濟陰號廣壽子

神農連山氏祝融之後始教民耕種百谷故號神農子孫相承五百三十九年

河圖代姓紀號為人皇時老君降于濟陰號大成子唐紀云連山氏之王天下也我太上救時屈已下為帝師付之於五運分

之於四時助之以正萬機明之以辨百谷變飲血茹毛之化移塊桴土鼓之音毀穴焚巢上棟下宇範金合土燔黍擘豚製耒耜以濟兆民作陶冶以利萬物天雨粟以呈瑞地芒稼而彰稔

黃帝有熊氏姓公孫土德起丁亥子孫相承共一千五百二十年

河圖代姓紀號為地皇時老君降世居于崆峒山號廣成子唐紀云有熊氏之王天下也我太上隱身於崆峒之中放心於杳冥之外帝乃親降輦輅禮展師資既摳衣

以趨隅遂屈膝而問道當是時也榆岡凌虐蚩尤作亂化魚鱉為兵士以助王師變雲霞為神祇潛扶軍陣能弭兵於涿鹿偃戈於阪泉東遊青丘之鄉北到洪隄之境受丹經於玉室登蒼冥於鼎湖屈軼生萸莢復出若非大道孰可致斯按玉緯經有三種三皇有前中後之異故稱九皇洞神大有經云三皇治各三千六百年又小有經云三皇治各萬八百歲詳此二說大有經止論一代三皇每一皇治三千六百

年小有經乃統論三代三皇每一皇治萬八百歲也若通論三代九皇則共經三萬二千四百年矣或言萬八千者蓋百字誤為千耳今據老子內傳所明正與大有小有相符又前三皇中三皇各經九千九百億萬歲者乃計一劫之大數非止言三皇之身也所言後三皇者傳記所載亦多不同如洞神經與項峻止以天皇地皇人皇為三皇而三墳書以伏羲為天皇神農為人皇黃帝為地皇而皇甫謐注春秋運斗樞鄭玄高誘注呂覽以庖犧女媧神農為三皇禮記謚號記以伏羲祝融神農為三皇孔安國章昭陶隱居以伏羲神農黃帝為三皇尚書大傳應邵譙周以燧人庖犧神農為三皇聊氏以有巢燧人伊祈為三皇帝系譜中經出塞記瀨鄉記以伏羲神農祝融為三皇所見不同難遽加雌黃也而梁武帝以伏羲神農燧人為三皇以黃帝少昊帝嚳帝摯帝堯為五帝謂舜非三王亦非五帝與三王為四代其說尤所不

通歷世紛紛莫有定論也

少昊金天氏黃帝之後金德起
辛未子孫相承共四百年

老君復降于崆峒號隨應子一號太極先生唐紀云金天氏之王天下也我太上乘九龍之輦降以為師號太極先生說莊敬

之典教之順時迎氣昭配神明羽族呈休命之鳥官理分九屬以統百師景合璧以表靈鳳衍圖而示既悉由至道彰此帝謨

顯帝高陽氏姓姬水德在位
七十八年元辛卯

老君降于衡山號赤精子唐紀云高陽氏

之王天下也我太上教之解紛塞允治國安民滌蕩九黎陟明八凱有龍野紫髯之兜醜有蛇身赤髮之渠魁力拔不周首觸山碎天低西北致日月之西行地亞東南使江海而東注追呼六甲役御百靈訓之

以微言之經教之以大順之道乘蒼虬之迅駕或適幽陵御素蟻以遐遊或臻蟠木

帝嚳高辛氏黃帝之後木德
在位七十年元辛酉

老君降世居于江濱號錄圖子唐紀云高辛氏之王天下也我太上敷道布化濟代

為師談黃庭之妙言隱日遁月稱錄圖之

嘉號返邑移城制九州之命作六英之樂封勾芒以佐蒼帝收薄收以翼白方封岱

嶽而印金泥照案區而開玉鏡飲太活之井遊不夜之鄉

帝堯陶唐氏姓伊祈大德在
位七十年元戊戌

老君降世居姑射山號務成子唐紀云陶唐氏之王天下也我太上暫垂至理下降為師講玄德之經道以匡於玄化應丹陵之瑞名冀列於丹丘披鹿裘以食糲饌端

拱於土階掛鶴斃而飲流霞凝思於瑤圃

帝舜有虞氏姓姚土德攝位三十
年在位五十年元戊申
老君降世居河陽號尹壽子唐紀云有虞氏之王天下也我太上談無為之理講離合之經三苗克桀四罪咸服百揆時序五

典謹微懷明神之珠賜照華之玉按孔子家語季康子問曰舊聞五帝之名而不知其實請問何謂五帝孔子曰昔丘也聞諸老聃曰天有五行水火木金土分時化育以成萬物其神謂之五帝古之王者易代

而改號取法五行五行更王終始相生亦

象其義故其為明王者死配五行是以太皞配木炎帝配火黃帝配土少皞配金顓

帝配水也康子曰太皞之始以木如何孔子曰五行用事先起於木木東方也萬物

之初出焉是故王者則之而首以木德王

天下其次則以所生之行轉相承也康子曰吾聞勾芒為木正祝融為火正蓐收為金正玄冥為水正后土為土正此五行之

主而不得稱曰帝者何也孔子曰凡五正者五行之官名五行佐成上帝而稱五帝太皞之屬配焉故亦云帝從其號也少皞氏之子曰重為勾芒曰該為蓐收曰修及熙為玄冥顓頊氏之子曰黎為祝融共工氏之子曰句龍為后土此五者各以其所能業為官職生為上公死為貴神則稱五

紀不得同帝也康子曰陶唐有虞夏后商周獨不得配五帝意者德不及古耶將有限乎孔子曰古之平治水土及播植百穀者衆矣維句龍氏兼食於社而棄為稷

神歷代奉之無敢易者明不可與等也故自太皞以降逮為顛頊應五行而王數非從五而配五帝是其德不可以多也宋朝劉道源通鑑外紀於舜紀叙曰六經皆不稱三皇五帝三王易下繫辭曰庖犧氏沒

神農氏作神農氏沒黃帝堯舜氏作繼世更王而無三五之數或以庖犧至舜為五帝孔子未嘗道者不可附會臆說也管子稱明一者皇察道者帝通德者王謀得兵勝者霸孔穎達謂管子書或是後人所錄

非本書也或謂莊子列子皆寓言誕妄秦漢學者宗其文辭論議故競稱三皇五帝而不知古無其人其論辯雖若可取然考之實故亦未為通論又其所載帝王世數歲月考之歷代紀傳及長曆皆抵牾不合推之甲子又參差抑傳寫者之誤與其固欲求異於人與抑第究其大體而不暇計其細與特未可知也且如宰我問孔子以上世之傳孔子猶曰略聞其說而已況去古逾遠而才不逮聖人者乎至於季康子

五帝之問則對以昔聞之老聃云未嘗敢謂古無其人也此亦見聖人信而好古之意唯司馬遷帝紀表曰學者多稱五帝尚矣然尚書獨載堯以來而百家言黃帝其文不雅馴縉紳先生難言之孔子所傳宰

予問五帝德及帝繫姓儒者或不傳余嘗西至崆峒北過涿鹿東漸于海南浮江淮矣至長老皆各往往稱黃帝堯舜之處風教固殊焉總之不離古文者近是予觀春秋國語其發明五帝德帝繫姓彭矣顧第

弗深考其所表見皆不虛書缺有間矣其軼乃時時見於他說非好學深思心知其意固難與淺見寡聞者道也夫太史公博極群書歷訪古迹其為良史宜矣
夏禹姓金德元年戊戌建寅正月
老君降世居商山號真行子唐紀云夏后氏之王天下也我太上克佐王道爰作帝師談德行之經行為國之法
商湯子姓水德元年庚戌建丑正月在位一十三年子孫相承共六百一十三年
老君降世居于潛山號錫則子唐紀云成

湯之王天下也我太上權離左極下為王師說長生之經體自然之道

以上事迹互見于帝系譜帝王世紀同神大有經玉歷經出塞記地理志譙周古史考神仙傳郡國圖經云老君雖分身下降隨世立教事竟則隱故在世未有誕生之迹

- 外丙 元年癸亥 在位二年
- 仲壬 元年乙丑 在位四年
- 太甲 元年巳巳 在位三十三
- 沃丁 元年壬寅 在位二十九
- 太庚 元年辛未 在位三十五
- 小甲 元年丙午 在位十七
- 雍己 元年癸亥 在位二十
- 太戊 元年乙亥 在位七十五
- 仲丁 元年庚寅 在位一十一
- 外壬 元年辛丑 在位五年
- 河亶甲 元年丙午 在位九年
- 祖己 元年乙卯 在位二十一年
- 祖辛 元年乙亥 在位一十六

沃甲 元年辛卯在位二十二年

祖丁 元年癸丑在位二十二年

南庚 元年乙亥在位二十九年

陽甲 元年甲辰在位一十八年

十七年庚申老君自太清境分神化炁託

孕於玄妙玉女

盤庚 元年壬戌在位二十九年

小辛 元年辛卯在位二十一年

小乙 元年壬子年在位二十年

武丁 元年壬申在位五十九年 號高宗

九年庚辰二月建寅十五日商之二月望今之上元節也通鑑外紀云自夏之前皆以建寅之月為正月湯革夏命乃以建丑為正月也

老君降生自陽甲十七年託孕至此八十年

劉向列仙傳云老子生於商時嵇康皇甫

謐云生商末唐朝以生日為真元節樂朋

龜記云商高宗御極之世周文王演易之

初神光流入於瓊胎瑞彩結成於金骨不

拆不副誕彌於八十餘齡降世降生過期

者二萬餘書四十三年甲寅老君降乘白

鹿登庭檜之杪而飛昇今有昇天履迹在

亳州太清宮

祖庚 元年辛未年在位一十七年

祖甲 元年戊子在位一十七年

亶辛 元年乙巳在位六年

庚丁 元年辛亥在位二十一年

武乙 元年壬申在位四年 傳悞上天暴雷擊死

太丁 元年丙子在位四年

帝乙 元年庚辰在位二十七年

辛紂 元年丁未在位二十七年 終於西面

二十一年丁卯老君降于岐山之陽號燮

邑子周文王為西伯召為守藏史世本云

老君在商為柱下史鄭玄注論語云老彭

商之賢大夫也孔穎達疏言老是老聃

周武王 姬姓木德建子為正月起於西藏商 即位九十六年子孫繼立者八百六

年十五 遷老君為柱下史史記及劉欽七略皆云

為周守藏史葛洪及內傳云文王時為守

藏史武王時為柱下史唯劉向列仙傳云

生於商時為周柱下史轉為守藏史既生

於商其為兩史故當在文王之世然或先

或後特未定爾按揚雄方言云嘗聞伐輶

軒之史秦籍之書皆藏於周秦之室又莊

子云孔子將西藏書於周室子路謀曰由

聞周徵藏史有老聃者藏室云者皆考證於老子故曰徵藏

夫子欲藏書則試往因之蓋仲尼將藏書

以老子嘗為史官諳知藏室前言往行故

先訪之也按周禮王太史內史外史御史

凡五史諸侯亦有國史故禮記君動則左

史書之言則左史書之左史視禮內史太

史為諸史之長掌四方之志三皇五帝之

書藏之於室故謂之守藏史周幽王時有

伯陽父唐固注云周柱下史老子也烈王

有太史儋儋亦老子也太史為周下大夫

謂五史之任總之太史記言記事嘗在君

前柱下即史官所立之處因為曹局之名

而韋昭云伯陽為大夫者謂職為太史官

即下大夫也史記稱張蒼好書歷秦時為

御史大夫主柱下方書據周禮御史掌贊

書及贊教凡其方書及內史所掌此秦官

不與周同也世本云在商為守藏史在周為柱下史蓋文王以侯服事商未得稱一周耳則先為守藏後居柱下無疑矣劉向之言謂先聘為太史以其靜退却為他史當老子時復更免歸烈王之時又為太史

一居周世時歷數王故亦徧參諸史是以守藏柱下先後不同班固云老聃者周之老史遊於柱下以究高年據固之言則為累代史官故稱老史隋內史薛道衡撰祠庭頌其序云爰自伏犧至於周氏綿紀歷

代見質變名在文王武王之時居藏史柱史之職市朝累易容貌不改

成王元年戊寅在位四十七年

老君仍為柱下史號經成子授道周公乃遊西極大秦竺乾等國號古先生按老子內傳云伏犧時號鬱華子神農時號傳豫子祝融時號廣壽子軒轅時號廣成子顓帝時號赤精子帝嚳時號錄圖子唐堯時號務成子虞舜時號尹壽子夏禹時號竄真子作真行商湯時號錫則子又文王武王

凡為十二帝師梁黃門侍郎蕭子雲撰清虛館碑亦云太虛遼廓迹絕言象應感倂通緣物致稱伯陽降娠垂髮皓素堯曰務成舜曰尹壽赤精當生於顓帝錄圖出自於神農得一含元百王資始又曰邀神九天之上遊精魏闕之下巍巍蕩蕩莫得而

名云舊記並以老君在神農時為大成子帝嚳時為錄圖子此碑獨謂錄圖出自神農而內傳又謂神農時為得豫子諒未能無少誤要當以經傳為正抱樸子葛洪作

神仙傳疑歷代為帝師謂皆見碎書不出仙傳正經又謂不應背澄清而入臭濁棄天官而受人爵且曰有天地則有道術道術之士世世有之何必常是一老子耶皆由晚學之徒好奇尚異欲推尊老子故有此說耳唐吳天觀主尹文操嘗著論駁之曰抱樸撰傳意在顯述老君起自修成將以訓誘後人令其勉力故云若謂老子是得道之人則人必勉力競慕若謂是神靈則非可學也斯其臆見耳殊不知開闢之

始因學而得道者必有自然聖降而為師隨機傳受焉定志經云昔天尊造大慈之初行應自然暗與理合自然玄悟本無文字撰集成經以教將來爾由是觀之則老君自然學道而世世為師亦何疑焉既為

大慈之父亦何辭捨尊就卑和光臭濁乎老子謂關尹子曰上世以來所更如沙塵動則有載却自惟甚苦勤太玄經亦云老子積學輪轉位登上聖應接無方不可稱述近世出化生乎殷末虞宣出塞記云老

子凝神太玄之鄉分靈散景世世下教鶴山崔元濼鄉記云老子應見代代有之葛仙公云開闢以前下為國師世世不休文始鬼谷張輔漢並云老君生乎太無之先經歷天地不可稱載此豈謂碎書與晚學淺見道歟稚川持未之思耳

康王元年乙丑在位二十六年

老君復歸于周號郭叔子復為柱下史

昭王元年辛卯在位五十年老君去官歸亳

二十三年癸丑五月壬午老君西過函谷

關度關令尹喜或謂老君出關雖在周癸
丑歲五月壬午恐非昭王時有言幽王時
者今檢幽王庚申年五十一歲為犬戎所
滅其時無癸丑歲也或謂宣王四十年癸
丑五月十八日壬午者推其歲月四十三
年丙辰老君在渭川告宣王以周將衰幽
王二年三川震老子曰周將亡幽王即宣
王之子若宣王四十年出關則四十二年
不得尚在渭川幽王時亦不得見三川震
也平王四十三年歲亦在癸丑而五月又
無壬午姚長謙年帝記謂景王十年丙寅
為孔子師敬王三十二年癸丑度關夫孔
子生於靈王之庚戌至景王丙寅年方十
七未應往師老子也況穆王西遊已聞尹
真人遇老子得道飛昇由是欽慕遺風遂
修樓觀置道士以奉祠事則知老子度關
決不在穆王之後也惟內傳之文與仙公
之言符合自餘紛紜之論終於理義乖違
固不可撫以為實
二十四年甲寅老子傳道尹喜授以道德

五千言即於喜宅南小山上昇天是時有
五色光貫紫微井水皆溢自商高宗九年至此凡二百七十四歲也
二十五年乙卯老君復分身降生於蜀國
李太官家前漢劉向列仙傳云老子生於
商時為周柱下史轉為守藏史時稱為隱
君子仲尼見之知其聖人乃師之乘青牛
車去入大秦關令尹待而迎之嵇康皇甫
謚皆云老子生於商末葛孝先乃謂周時
託神李母者正謂降生於李太官家之時
也或為商祚將盡周祚已興所以商末時
生亦何言周時託化此胎未必然也
二十七年丁巳老君會尹喜於青羊肆將
去化胡故唐紀云青羊肆者太上天皇大
帝第二降生之所也自商道否閉周德陵
夷歷藏史以同塵棄柱史以隱迹東離魏
闕西度函關又云重為千日之期再結一
時之會將離蜀土欲化胡風遠適流沙長
移獷俗及身毒屬西胡羣布織毛為之實之國教煩
陀阿柱之王又魏明帝製老君贊云深憫

後世託下於陳為周柱史經九百年無極
之際言歸崑崙化被胡域次受罽賓後及
天竺於是遂遷又魏略西戎傳北史西域
傳並云于闐國西五百里有毗摩寺云是
老子化胡之所也出見唐通典
二十八年戊午老君同尹喜真人降于天
水啓靈山今秦州有西昇臺聖容殿俱存
穆王元年辛巳在位五十五年壽一百有五歲
老君化胡已即昇天
四年甲申老君復降於中國東遊扶桑會
大帝校集群仙遂遊西海至蘇鄰國號為
大光明使尋即復昇天穆王聞尹喜真人
得道上昇乃為修樓觀立道士七人以奉
祠事見穆王內傳及樓觀先生傳
共王元年丙子在位一十二年
懿王元年戊子在位二十五年
孝王元年癸丑在位一十五年
夷王元年戊辰在位一十六年
老君與玄古三師降于蜀綿竹之三學山
授李真多以飛昇之道今號真多治

厲王元年甲申在位三十六年

二十一年甲辰老君降于樓觀授道士宋倫以中景之道通真之經并靈飛六甲素

奏丹符

周召共和起庚申時厲一統于嘉太子幼相和協共理國事十四年厲王崩乃

立太子是為宣王

宣王元年甲戌在位四十七年

四十三年丙辰老君降于渭川告宣王以

歲星北遷言周將衰後二年而幽王立今渭側有伯陽川是其處見地理志時有採薪行

歌者人莫能識以問老君老君曰此活國

人修習無上正真之道也唐歷代應見圖

幽王元年庚申在位十一年

第二年辛酉地動經渭洛皆震老君言周將亡矣不及十年數之紀也後果為犬戎

所滅出史記

平王元年辛未年在位五十二年東遷洛邑

三十三年癸卯十二月老君復出關開化

諸國遂至西海流麟等洲考校群仙事訖

復還中國出西昇經

威王元年壬戌在位三十三年

莊王元年乙酉在位一十五年

九年癸巳四月建卯初七日夜釋迦佛生釋氏瑞應經云四月八日夜半生此用周

正也又過去見在經云二月八日生此用

夏正也老君時年六百一十四歲釋迦生

於周莊王九年乃春秋魯莊公之七年當

夏四月常星不見夜明是也至魏武定八

年凡一千二百三十七年云出魏書釋老

志及隋書經籍志頭陀寺碑云周魯二莊

親昭夜景之鑑見梁昭明太子文選齊王中作梁邵陵王

上表云常星不見周鑑娠徽滿月圓安漢

感宵夢見唐僧法苑珠林

僖王元年庚午在位五年

惠王元年乙巳在位二十五年

襄王元年庚午在位三十三年

項王元年癸卯在位六年

匡王元年己酉在位六年

四年壬子佛入涅槃釋氏金光明經云壽命短促方八十歲是也

定王元年乙卯在位二十一年

王問老君以在世神仙老君對以中嶽有

古先生即予是也出聖祠宮張僧鑑澤陽記

簡王元年丙子在位一十四年

靈王元年庚寅在位二十七年

二十二年庚戌十月二十一日孔子生

景王元年丁巳在位二十五年

悼王元年立五月

敬王元年壬午在位四十五年

十七年戊戌孔子謂南宮敬叔曰吾聞老

聃博古該今通禮樂之原明道德之歸則

吾師也今將往矣明年遂與敬叔俱至周

見老子按莊子云孔子行年五十乃南之

沛見老子計是此年也其問禮及藏書等

事雖見禮記孔子家語及史記而皆不繫

年月故莫知其先後也然家語所載子夏

問於孔子曰商聞易之生人及萬物各有

奇偶氣分不同惟達德者能原其本也天

一地二人三三三為九九九八十一一主

日月數十故人十月而生八九七十二偶

以從奇奇主辰辰為月月主馬故馬十二
月而生其餘各從其類也鳥魚生陰而屬
陽故皆卵生魚遊於水鳥遊於雲故立冬
燕雀入海化為蛤介鱗夏食而冬蟄訖吞
者八竅而卵生齟齬者九竅而胎生四足
者無羽翼戴角者無上齒畫生類父夜生
類毋敢問其然乎孔子曰然吾昔聞之老
聃亦如所言由此觀之則孔子謂老聃博
古該今故無所不就學焉何止問禮及五
行五帝而已乎

四十四年建壬戌孔子卒

見孔子家語及左氏傳老

北王元年乙丑

正定王元年癸酉

哀王元年

思王元年

考王元年辛丑

威烈王元年丙辰

安王元年庚辰

十八年丁酉秦獻公立

夷烈王元年丙午

二年丁未老君還秦秦獻公授館致禮問

於歷數老君遂出散關出史

顯王元年癸丑

八年庚申秦孝公立老君東還遊赤城蒙

山重過扶桑較集群仙已而隱于景山太

室少室出王子年拾遺記

慎親王元年癸丑

報王元年丁未西周遂亡

九年乙卯秦昭王立老君與尹喜諸仙西

遊女兒鷄頭天柱復出散關遂昇崑崙還

紫微上官昭王聞之乃於老君所經遊處

為置城邑以表聖跡故立老君停驛尹喜

城謹按老君本記并諸史傳記並云老子

以商武丁庚辰生於亳壽乘白鹿而昇天

後一百八年帝辛丁卯降于岐周今以長

歷推之武丁元年壬申九年即庚辰也傳

記云老君以周文王時為守藏史武王時

遷柱下史推武王以癸酉口受口口商自

武丁庚辰至此癸酉凡一百七十四年也

傳記云老子以周昭王癸丑五月壬午將

去周七月十二日到函谷關度尹喜推昭

王元年辛卯二十三年癸酉自癸酉至癸

丑凡一百有一年通前凡二百七十四年

乃西度也傳記云老子甲寅年四月於樓

觀昇入太微次年乙卯分身生於蜀後二

年丁巳與尹喜會於青羊之肆遂同往西

域至穆王元年復還中夏東過扶桑大帝

之所較集群仙自昭王二十三年癸丑至

穆王元年辛巳凡二十八年則老君化胡

訖復還中夏之時也史記云周幽王二年

辛酉三川震老子言周必亡自穆王辛巳

至此辛酉凡二百二十年通前凡五百二

十二年也平王二十三年癸卯老君復出

關遊西海較集諸仙魏書釋老志云釋迦

生時當周莊王九年春秋魯莊公七年四

月辛卯常星不見是也按莊王元年乙酉

即九年癸巳也自幽王辛酉至此癸巳九

十二年通前凡六百一十四年而後佛生

至臣王四年壬子入滅周靈王二十一年

庚戌冬十月二十一日庚子孔子生自莊王癸巳至此庚戌凡一百三十七年通前凡七百五十一年也景王十五年辛未南宮敬叔生時孔子年三十五歲敬王十一年壬辰魯定公即位始命敬叔為大夫辭

以先入遺命使事孔子至定公七年戊戌孔子年五十乃南之沛見老子即老君應化諸方訖復還中夏之時也自靈王庚戌至此戊戌凡四十九年通前凡七百九十九年也傳記云秦昭王聞老子過為散關

修城邑據昭王立五十一年乃滅周推周赧王元年丁未九年乙卯乃秦昭王即位之歲是時老君將昇於崑崙還紫微之時也自敬王戊戌至此乙卯凡一百九十七年通前計九百九十六年也老君應感無

方變化莫測或昇或降莫能究悉今考傳記并長曆推計自商武丁庚辰至周赧王乙卯凡出入隱顯綿歷九百九十六年在商一百七十四年在周八百二十二年正與史傳及諸經典相符魏明帝讚云為周

柱史經九百年唐大學博士吳楊昊亦云老君變通靈應難測既生商日又仕周時計其始終乃立千載此皆舉其成數也史記稱或百六十歲或云二百歲者是據孔子時人斟酌老子之歲數云爾不能知其

實是以每事言蓋言或也又列仙傳云去入大秦又云與尹喜俱遊流沙莫知所終皇甫謐云西之流沙作浮屠經以化戎俗文始內傳云老子出關周遊八十一國後至屬賓化胡劉向讚曰德合元炁壽同兩

儀據諸傳記說雖不同莫不讚其長壽蓋儒者以長生昇天之說為怪誕故但云莫知所終說其未嘗死也唐尹文操論云老君乃積劫得道之大聖人也故能寄惠人間和光顯千變萬化今古常存惟莊子

假設秦失參號之說將以逆蕩凡淺執生者耳而梁武帝遂以老君為尸解之仙謬矣徧尋老子始終竟無解蛇之迹而莊周獨云爾者亦猶雲將鴻濛之類並傲吏之寓言若以為實則孔子見盜跖亦可為實

事耶按王子年拾遺記云老子至周之末居于景室之山嘗云我常在人間不去須臾或為凡或為聖但流俗之人不知之人行善惡各有罪福如影之隨形響之應聲若能思真念善自可與我相遇以此詳之

尤明其不死審矣又按龍躡經云老子於大羅天明霞觀中告九天丈人曰吾今應相境界通身上顯諸天下應萬象歷劫演化開度兆人有道上賢降為師授或生下界與物混冥託質通凡浮沉莫辯與道通

化應接有緣潛行救度不特有恩既其神通自在世世隨機降應何生死之能累手兒曹以管窺天果不足怪或云老子受學於容城或問道於常樅此蓋至人好賢樂善以多問寡亦將造端於師資以垂世立

教耳豈真有所授受耶舊傳記其子孫顯仕繼世不絕者此又至人不欲索隱行怪以驚世駭俗故示幻迹以和光同塵耳今慮後世貪縱之夫認幻為真而託道為姦者將授以藉口故皆刪之至十六變之說

事迹隱晦亦無述焉

秦始皇帝元年乙卯在位三十六年

二十八年壬午封禪泰山乃建老君祠於

樓觀之南躬行饗祀老君降于祠授帝以

鬼林經策使鬼神之符出樓觀傳

前漢文帝元年壬戌

老君先降于陝河之濱號河上公亦曰河

上丈人帝親訪之老君授以道德經也今

陝州府北有河上廟并文帝望仙臺存焉

出史記及抱樸子神仙傳或作景帝誤矣

成帝元年癸巳

河平二年甲午老君降于琅琊郡曲陽淵

授于吉太平經出後漢書

後漢明帝佛法初入中國

章帝元年甲申

元和二年乙酉老君再降授于吉真人一

百八十戒

安帝永初元年丁未

永初三年巳酉老君降于泰山召江夏史

劉圖較定天下簿籍因示罪福報應之事

見唐記聖賦及應現圖

順帝永建元年丙寅後六年改元陽嘉又四年丙子改元永和又六年壬午改漢安又改二年甲申

漢安元年壬午老君降于蜀之鶴鳴山授

天師張道陵正一盟威秘錄五月再降賜

泰清中經九百三十卷符文七十卷建康

元年甲申老君再降于閣州雲臺山授天

師三洞衆經及超度九祖齋直之法見天師傳

及蜀國經

桓帝建和元年丁亥後三年庚寅改和平又二年辛卯改元嘉又二年癸巳改永興又二年乙未改永壽又三年戊戌改延熹又九年丁未改永康

永壽元年乙未老君降于成都授天師止

斗削死注生之法今成都府玉局化即其

地又降于鹿堂山授以制六天斬邪文見天師傳及蜀國經

延熹八年帝遣使詣陳祀老君命邊韶撰

碑文九年帝親祀老君於濯龍宮用郊天

樂並見後漢記

靈帝建寧元年戊申後四年壬子改熹平又六年戊午改光和又六年甲子改中平

光和二年巳未老君降于天白山授仙人

葛玄上清靈寶大洞等經及三錄七品齋

法勸戒法輪轉神入定等經見天台山記及太極仙翁傳

魏陳留主

咸熙元年甲申老君降于隴右臨洮郡謂

王始曰天下不久當太平見晉書

晉安帝隆安元年丁酉後五年壬寅改元興又三年乙巳改義熙

元興元年壬寅姚秦洪始五年也老君下降按行

山嶽至華山救仙人成公興令移居嵩山

仍賜以仙藥見後魏書

後魏明皇帝永興元年即位十五年改元神瑞又二年改元泰常

神瑞二年乙卯晉安帝義熙十一年也老君降于嵩

山授道士寇謙之雲中音誦新科之戒泰

常二年丁巳老君再降賜寇謙之符錄七

十卷見後魏道釋志

太武皇帝

太平元年老君降于嵩山命寇謙之授帝

以太平真君之號遂改元太平真君出魏書

隋煬帝太業元年乙丑

太業十三年丁丑老君降于終南山語山

人李淳風以唐公受命之符出金鎖流珠記

唐高祖武德元年戊寅

武德二年己卯老君降于羊角山語吉善

行令奏聞云我帝祖也今唐得聖治社稷

延長出唐記

五年壬午老君再降于廟所告以破賊之

期出唐記

高宗永徽元年庚戌後七年丙辰改元顯慶又五年辛酉改元龍朔又二年甲子改元麟德又二年丙寅改元乾封又二年戊辰改元總章又二年庚午改元咸亨又四年甲辰改元上元又二年丙子改元儀鳳又二年己卯改元調露又一年庚辰改元永隆又一年辛巳改元開耀又一年壬午改元永淳

龍朔二年壬戌帝幸洛陽宮建清廟於址

邛治以祠老君設醮慶讚老君降于殿上

二真人夾侍光耀階壇眾咸瞻仰宮闈今

權大力等列狀奏聞照依所見圖寫為瑞

像見洛陽錄事抄護師奏狀

乾封元年丙寅帝封岱嶽駕至臺朝謁老

君御製冊文上尊號曰玄元皇帝聖母為

先天太后出唐書

儀鳳三年戊寅帝敕建齋於陽清廟時老

君降于壇上祥光照映乘白馬履壇石皆

有跡眾所瞻仰登時奏聞賀表云金相玉

毫彩奪夜明之景白駒丹鬣跡留天駟之

庭見朝散大夫孫瑞奏狀

則天武后嗣聖元年甲申二月改元文明九月又改元光宅攝位二十二年乙巳

一改元神龍元

文明元年申申老君降于虢州皇天原命

鄔元宗令傳言武后不可革命出唐書景龍

四年庚戌為平內難疑決老君為

白衣老父賣卦於春明門外象曰宜取天

下吉利在三日內後於其處立廟出唐書

玄宗明皇開元元年癸丑

後二十九年壬午改元天寶又三年甲申

改年為載開元十七年老君降于蜀州新

興寺隱景於佛殿柱中宛如刻畫削洗愈

現本路文武官及道僧俗尼同狀奏聞有

云現於殿柱杳疑作史之年照彼佛祠緬

若化胡之日見於益州長史張敬中奏狀表

開元二十九年老君降于丹鳳門外語曰

同秀曰我昔日入流沙藏一金靈符在尹

喜舊宅可奏帝取之帝遣使求得之於函

谷關故墟出唐書

天寶二年癸未正月上老君尊號曰大聖

祖玄元皇帝十二月帝幸華清宮老君降

現于朝元閣上遂改朝元閣為降聖閣出唐書

天寶七載戊子老君尊號曰聖祖大道

玄元皇帝

九載庚寅老君降于太白山語山人王玄

翼以寶仙洞有妙寶真符上命刑部尚書

王倕等往求果得之出唐書

十三載甲午二月癸酉帝朝獻太清宮加

上老君尊號曰大聖祖高上大道金闕玄

天元皇大帝出唐書

十五載丙申帝幸蜀老君降于漢中郡黑

水之側帝命刻石像於所見之處又乘白

鹿降于利州昌嶺上以示收山之兆詔於

所現之處立自然觀出唐書

肅宗天寶十五年丙申改元至德又三年戊戌改元又二年庚子改元

至德二年丁酉老君降于通化郡雲龍巖

自地接天儀相炳然詔圖其本明皇御讚
曰晝現殊相空浮瑞色道釋人天作禮瞻

奉申命藻繪示諸郡國見唐太上
皇瑞諸序

敬宗寶曆元
年乙巳

寶曆二年丙午老君降于太清宮前御路

指示長安縣鄭剪陷井之處見柳公權書
韋處厚所撰

碑

懿宗咸通元
年庚辰

咸通十年己丑龐勛領三千餘人欲劫奪

太清宮時士庶數百餘家在宮避難咸見

老君乘空而行須臾黑霧昏暈賊迷路自

相蹂踐龐勛亦溺水死見汴州節度
李尉奏狀

宋真宗皇帝祥符元
年戊申

大中祥符七年甲寅駕幸亳州謁太清宮

親奉冊寶上尊號曰太上老君混元上德

皇帝出宋朝
事實

徽宗皇帝政和元
年辛卯

政和二年壬辰老君乘白馬駕祥雲降于

茅山玉晨觀授梁光映加句天童經其餘

降現事迹紀傳不繫時代者不述與夫放

先見瑞示夢傳言靈驗等事非化身下降
者亦復載于譜也

混元聖紀卷之一

正一天師清微弟子 洪百堅 製作
道教學術資訊網站

混元聖紀卷之二

與三

宋觀復大師高士謝守灝編

太上老君乃大道之宗祖三才之本根也太

極之先寥廓何有道源肇啓炁母混成頌洞

溟滓兆朕胚臍中有真精自然而生是為神

明強名虛皇潛司玄化道運御世一炁分三

為玄元始三炁混合氤氳漸著為萬象之端

莫知其先強目曰元莫知其初強目曰始故

曰元始天尊三炁相生九炁混合化生諸天

成就世界莫知其大強目曰太莫知其高強

目曰上首出無極仰之曰老宰而無我主之

曰君故曰

无上三天玄元始三炁太上老君焉初自一

炁而分三炁是為三天三炁合生九炁是為

九天

自大羅天生清微天禹餘天大赤天三清

境也自三天下生鬱單天禪善天須延天

兜術天不驕樂天洞天梵輔天清明天

無想天此九大梵天也九天又各下生三

天合三十六天其外諸小梵天悉係屬於